

玄覽堂叢書

第六十七冊



舊京詞林志卷四

紀典下

職掌

典制誥

應制

侍講讀

纂修書史

考究禮制

參理刑政

校選人才


進獻歌頌

侍直

扈從

奉使

撰述表箋



--	--	--	--	--	--	--	--	--	--

典制誥

唐宋以來分內外制詞爲兩制內制翰林學士掌之
赦書詔勅批荅口宣皇后太子冊文王公將相妃
主制詞蕃書鐵券青詞齋文歎道文致語及祝文
碑文上梁文樂章春帖之類是也外制中書舍人
掌之文武百官遷擢加恩追封先代誥勅及內官
命婦誥勅之類是也 國初兩制皆歸本院故自
學士以至直學士皆知制誥待制修撰皆同知制
誥中書舍人唯主謄寫而已永樂初皆屬之內閣
焉其所撰述文字曰赦書曰詔書曰勅書曰宗廟

玉册文曰皇后太子册文曰親王郡王册文曰公

主册文曰官妃册文曰祭告天地祝文曰郊祀祝

文曰宗廟告享祝文曰祭司中司祿等神祝文曰

親王功臣廟祭祝文曰巡狩祭所過山川神祇祝

文曰皇太子之京親王之國祭所過山川陵廟神

祇祝文永樂十八年東宮如北京凡經過合祀神祇禮部行本院預撰祝文嘉靖四十年景

王之國過南京謁拜陵寢禮部亦行本院預撰祝文將至應天府關請撰祭龍江祝文本院以前

途無事曰皇太子諸王冠禮祝詞婚禮戒詞曰功

臣券誥文曰神道碑曰壙誌曰功臣下葬祭后土

祝文曰文武官諭祭文曰贈官賜謚誥文曰碑記

如太學碑文宣王廟碑劉越王廟
碑體泉亭碑進士題名碑之類
曰郊祀樂章曰

宗廟樂章曰宴享九奏樂章曰回鑿歌章
洪武十三年本

院進小九奏曲清江
引等曲未知所用
曰清詞曰佛表
永樂六年六月請佛奉安

仁孝皇后几筵命翰林院撰道教清詞其
僧錄寺佛表命禮部翰林院太常寺計議
曰公侯

伯封贈三代誥命
洪武初公侯伯三代封爵惟父與子同曾祖祖遞降一等二十

九年命封公者三代皆追封為公封侯者三代皆
追封為侯改給誥命永樂初公侯封贈亦准此例

曰文官誥勅命
國初在京大小文官在外參政僉事及知府同知知州初授皆給本

身誥勅元年命給京朝官祖父父母
妻室誥勅命其後唯考滿稱職者有之
曰武官誥

勅命
國初大都督府及內外各衛指揮千百戶衛所鎮撫初授皆給本身誥勅元年定封贈之

制十三年換給三代誥勅
者至二千四百七十二人
曰駙馬儀賓誥命
洪武永樂

中凡初選授者皆給之

曰內官誥勅命

洪武初內使監令等官皆給勅命亦有封

贈父母者後不行

曰女官誥命

洪武元年十二月修撰陳

合與女史職名撰誥與之既而命封孺人給與六品誥命二十二年十二月賜六尚局宮官勅命

曰蕃王誥命

如封不納刺為鎮西武靖王及淳泥國王等王之類

曰土官誥

勅命

洪武中凡歸附土官皆給誥勅命其後承襲父兄職者亦給與之至永樂中亦然又有封

贈祖父母父母妻室者如洪武十二年授播州宣慰使楊鏗之類

曰真人誥命

洪武

元年授天師張正常正一嗣教護國闡祖通誠崇道弘德真人誥命三年又贈正常父嗣成正一

教主大玄弘化明誠崇道大真人母胡氏封恭順慈惠淑靖玄君其後子宇初宇清襲官亦給誥命

曰國師禪師誥命

永樂三年授烏思藏帕木竹巴灌頂國師闡化王誥十五年授

刺麻班綽兒

而一時應制詩文之類不與焉洪武

慧智禪師誥

初唯文武官誥勅最煩是時大小官寮除授之日無不給制命者詞臣撰述不及乃令儒士徐一夔牛諒等分撰之洪武二年二月始命撰內外衛千戶鎮撫誥文四篇首尾通用中間各人事蹟隨事填之十月又命一應文武官誥命都撰成定格首尾通用然詞臣尚徃徃有以遲慢得罪者十六年始定京官一年稱職者方給本身誥勅三年稱職方與封贈外官一考稱職者方給本身誥勅再考稱職方與封贈京官四品以上取自上裁於是其務稍簡永樂中誥勅不常給唯詔冊勅諭之類

多焉遷都以後事歸北院近例惟修理南京宮殿陵廟所用祝文則本院撰之

洪武時詞臣所撰誥勅皆於御前奏讀或進覽而後行亦有上自改易者如明州衛權襲僉事張用誥文云爾兄張億委身事朕比者隨征海寇致隕其生今念其身歿子幼故命爾權繼兄職上命改比者十七字云今既已終念其子幼止用八字又有武臣誥文云佐朕武功遂寧天下上命改爲輔朕戎行克奮忠勇待制吳沉等進省府臺掌記勅文御筆改君字爲朕字是也永樂六年冬

楊士奇撰巡狩北京詔草以進 上覽之再三喜

曰簡當更勿改易其擇日頒之又曰試與諸尚書
觀之諸人皆稱善獨兵部劉儁私於士奇曰請以
有字易自字何如士奇曰善即請於 上易之黃

淮執以爲不足易士奇曰於國家大體當用儁言

上命從之明日謂胡廣曰楊士奇能服善難得

原草云道路一切飲食供給之費皆已自備不煩於民後改爲有備

國初誥文猶仍宋元四六駢麗體洪武二年十月令
翰林誥詞務要正大簡當遂改散文六年復令禮
部禁止四六文字於是文益簡朴多者百餘言少

者四五十言而已永樂二年楊士奇等進呈邊將
勅藁 上曰武臣不諳文理只用直言俗說使之
通曉庶不誤事他日編入實錄却以文易之

應制

詞臣應制述作盛於唐宋 祖宗朝多有之蓋右文

之盛事也丙午年六月旱 上禱雨鍾山獲應賦

七言喜雨詩命待制黃哲等和之洪武元年十一

月召大本堂諸儒試以鍾山龍蟠賦八年五月御

端門召翰林詞臣出示巨桃半核此核乃元內庫所藏其長五寸

廣四寸七分刻西王母賜漢武桃及宣和殿十字命宋濂撰蟠桃核賦常

幸清流關賦詩命扈從儒臣和之起居注劉季道

有治定不教生縱逸功成猶遣歷間關之句 上

歎賞曰可謂安不忘危賜以白金文綺又常御西

鷹房觀海東青命學士宋濂咏之濂七舉足而成
有自古戒禽荒之語 上稱曰卿可謂善諫矣是

時應奉唐肅亦應制賦一絕云雪翮能追萬里風

坐令狐兔草間空詞臣不敢忘規諫猶憶當年鄭

魏公蓋指濂也 肅自記云上觀海東青宋濂諫曰禽荒古所戒上曰朕聊玩之耳

不甚好之也濂曰亦當防微杜漸上遂起 徐達北伐還 上御龍江

亭命魏觀賦詩紀之安南使臣杜舜卿歸國命儒

臣賦詩送之一日命大本堂諸儒撰縱豸鶴文吳

府伴讀王驥操觚立就學士宋濂為之進呈 上

稱善嘗宿方丘齋宮召應奉張籌及諸文學之士

命賦殿中柳檜併荷露梔子花諸詩親加品第

詳見

紀事

將有事於園丘又命大本堂諸儒賦七言律

十二韻冠以三百言序伴讀王驥與監生黃昶先
成跽讀御榻前 上聽畢獎之命於禁林進學太
子司直桂彥良嘗被命製香几贊司直郎汪魯被
命製續薰風南來諸曲皆稱旨典籍吳伯宗被命
賦十題援筆立就 上嘉其才賜織金錦衣起居
注蔣子杰應命詠物頃刻立成 上大悅寵以和
章其他賡歌唱和不可勝紀永樂間禁中凡節令
游賞如觀燈剪柳諸樂事翰林儒臣皆小帽襖徹

侍從以觀觀畢各獻詩詞 上親第高下賞黃封
寶楮有差永樂四年八月集翰林諸臣及修書秀
才十數人於丹墀內命賦白象詩擢庶子胡廣爲
第一黃淮爲第二餘賞賚有差八年北征至野狐
嶺召學士胡廣等賦平胡詩楊榮詩云聖主尊居
四海安天教戎虜自相殘旣而本雅失里與阿魯
台仇殺東西奔遁 上以前詩爲先兆召榮嘉諭
之榮下馬叩首謝 上喜命賜羊酒又次清水源
水乏人馬皆渴忽有泉湧出清澈可愛 上親嘗
之命曰神應泉明日廣等應制撰神應泉詩銘

賜上尊十五年元夕觀燈賜讌儒臣應制賦詩侍
講陳敬宗進詩五章 上稱善又嘗命諸文學侍

從賦天馬海青歌修撰曾啓最先成爲上所褒美
云其他文字以特命撰述者如祖訓昭鑒錄寶訓
日曆皆命學士宋濂序之精誠錄則命大學士吳
沉序之大誥三編則命左贊善劉三吾序之 上

評以爲無疵御註洪範書成亦命三吾序之禮儀
定式則命左春坊大學士董倫序之立皇陵碑命
侍講學士危素撰文尋以詞多隱諱乃自製焉立
楊王廟命學士宋濂爲碑文閱江樓觀心亭成皆

命宋濂爲記宣聖廟碑則命學士宋訥撰之甚稱
上旨蔣侯曹武惠王等碑則命學士劉三吾撰
之建文中省躬殿成命文博士方孝孺爲銘永樂
中醴泉出於神樂觀立醴泉亭則命侍讀胡廣爲
記云

侍講讀

太祖克婺州卽召儒士許元葉瓚玉胡翰汪仲山李
公常金信徐孳童冀吳履張啓敬孫震會食分中
書省中日令二人進講經史初建百司又以詹同
文吳彤爲國子博士魏觀吳琳爲國子助教嘗置
左右講誦經史登極之後乃命本院學士而下啓
沃內庭洪武三年二月御東閣學士宋濂待制王
禕進講大學傳之十章至有土有人濂等反覆言
之上曰人者國之本德者身之本德厚則人懷
人安則國固六年御西廡大臣皆侍坐上指大

學衍義中司馬遷論黃老事令太子贊善宋濂講
析俾在坐者聽之十六年六月御謹身殿東閣大
學士吳沉進講周書至國則罔有立政用儉人

上曰甚矣國家不可有小人有小入必敗君子故
唐虞任禹稷必去四凶魯用仲尼必誅正卯十八
年五月御華蓋殿文淵閣大學士朱善進讀心箴
上曰人心道心有倚伏之幾人能常持此心不
爲情欲所蔽則至公無私自無物我之累九月復
御華蓋殿命朱善講周易至家人 上曰朕觀齊
家之要只在誠實而有威嚴誠則篤親愛之恩威

嚴則無閨門之失其他辨論多類此者建文初學士董倫侍講方孝孺皆克經筵講官故孝孺詩有天子看書召講官之句成祖視朝之暇每御便

殿召儒臣講論書史是時已有經筵日講之制而

今不可考矣

南京光祿志云凡經筵日講東駕講讀酒飯俱本寺造辦此永樂間例也

國初命宋濂爲太子諸王師又命王禕采故實爲四言詩授太子旣而置大本堂取古今圖書克其中召四方名儒以教太子諸王用學士宋濂待制王禕修撰王僎典籍段禮儒士陶凱輩分番夜直選才俊之士克伴讀所授經書必親督之洪武六年

有言林志卷四
四月以孔克表爲修撰於秦王前說書七月又命
侍讀學士樂韶鳳於東宮前說書十五年十二月
以劉進道爲檢討文華殿說書十六年二月復命
進道春和門教書春和門者亦太子所居門也十
七年以饒仲恭張庸爲尚書博士侍潭魯二王說
書二十二年命學士劉三吾侍講學士葛鈞授晉
世子經以怠於教迪爲吏部所劾二十七年命韓
濬二王往省秦晉周齊諸王各從編修一人講說
經史永樂初東宮講讀以翰林院春坊官兼任之
永樂二年六月侍講兼中允楊士奇進呈文華殿

講義 上覽畢稱善因諭之曰孟子道性善必舉

堯舜爾等於講說道理處必舉前古爲證庶幾明

白易入是年七月侍讀學士王達侍東宮講乾之

九四舉儲貳爲說東宮疑之楊士奇以宋儒胡瑗

本說爲對東宮乃喜士奇又請今後翰林春坊諸

臣分撰諸經講義皆令內閣臣閱過有未當者悉

與改正於是解縉專閱書胡廣閱詩金幼孜閱春

秋士奇閱易是時徐好古作尚書直指金幼孜作春秋直指楊士奇作周易大義皆進

於東宮東宮諭士奇曰凡此皆書數本其年以陸

於齋閣便殿寢室各置一本得備觀覽具瞻署編修授趙王經次年趙王之國遂陞具瞻

爲左長史五年四月皇長孫出閣就學以修書教
諭魯瑄鄭禮爲待詔侍說書七年六月復以李遜
爲行在待詔侍漢王說書後陞漢府紀善十八年
十月以皇太孫講讀缺人擢教授林長懋蘭從善
訓導徐永達爲行在翰林院編修侍說書其他春
坊官不具載云

纂修書史

前代修史別立國史院國初以國史合於翰林故諸
學士皆兼修國史待制修撰皆兼國史編修官然
是時詞臣所職者唯代王言定國章爲急其於史
事不專任也洪武二年正月修元史以左丞相宣
國公李善長爲監修官前起居注宋濂漳州府通
判王禕爲總裁官纂修則儒士汪克寬胡翰宋禧
陶凱陳基趙壇曾魯高啓趙汭張文海徐尊生黃
箎傅恕傅著王鈞謝徽已而濂拜學士禕拜待制
三年二月續修元史仍以二人爲總裁官纂修則

儒士趙堦朱右具瓊朱世廉王彝張孟兼高遜志
李懋李汶張宣杜寅張簡殷弼俞寅其儒士皆取
未嘗仕元者也五年禮部尚書陶凱言漢唐皆有
會要記載時政宜令諸司取勘逐日時政可著爲
令者編爲會要令書 上從之本院乃委典籍張
訥往禮部共議其事會凱出爲湖廣參政未竟而
止六年九月復以學士承旨詹同等言命編日曆
以同與侍講學士宋濂爲總裁官侍講學士樂韶
鳳爲催纂官纂修則禮部員外郎吳伯宗儒士朱
右趙堦朱濂徐一夔孫大雅吳伯宗徐尊生也建

文初纂修 太祖皇帝實錄其人不詳在他書可

考者總裁則有學士董倫侍講方孝孺太常少卿

高遜志廖昇纂修則有檢討陳性善禮部郎中夏

止善博士王紳史官王景程本立高讓吳勤趙友

士端孝思張秉彝唐耕羅恢葉砥林嘉猷徐旭胡

子昭葉惠仲楊士奇景等或以逐臣或以學官或

以儒士皆近臣所薦用也其後復益以修撰李貫

編修吳溥楊子榮劉現侍書劉彥銘諸人

諸書所載互有

同異今併記之 洪武三十五年十月重修 太祖皇帝實

錄曹國公李景隆爲監修都總裁官兵部尚書忠

勤伯如瑋爲副監修官侍讀解縉爲副總裁官學士王景禮部尚書李至剛侍讀胡靖曾日章黃淮胡儼侍講鄒緝楊榮金幼孜楊士奇修撰李貫吳溥編修鄭好義檢討王洪五經博士張伯穎王汝玉典籍沈度潘畿待詔王延齡給事中朱紘吏部郎中徐旭禮部郎中胡遠太常博士錢仲益國子博士金玉鉉助教王達行人蔣驥王府教授吳勤張顯伴讀蘇伯厚僉事李燁葉砥知府劉辰鄒濟知縣楊靚梁潛王褒沈瑜趙季通唐雲教諭解榮劉宗平訓導傅貴清羅師程

師前

羅帆儒士端禮王孟

易朱逢古莫士安爲纂修官是時本院官無不預者其餘在外官生亦由本院薦用九年十月又重修之以戶部尚書夏原吉太子少師姚廣孝爲監修官文淵閣大學士胡廣學士楊榮祭酒胡儼爲總裁官而纂修則學士金幼孜楊士奇侍講學士曾棨侍讀梁潛侍講王英修撰羅汝敬刑部主事李時勉陳敬宗也

國初纂修諸書以本院官及他儒臣兼爲之洪武元年修女戒則侍講學士朱升等三年輯存心錄則命禮官及儒臣爲之

時編修江漢請儒士程彥初等五人共考歷代災異典故

六年修昭鑒錄則先命禮部尚書陶凱主事張籌
繼命編修王傑秦王博文原吉國子博士李叔允
助教朱復秦府錄事蔣子杰修辨姦錄則侍講學
士宋濂七年修孝慈錄則學士宋濂等八年修洪
武正韻則侍講學士樂韶鳳宋濂待制王傑修撰
李叔允編修朱右趙壘朱廉典簿瞿莊鄒孟達典
籍孫養谷祿與權皆本院官也修大明律濂亦與
焉十二年纂春秋本末則命東宮文學傅藻而典
籍劉仲質及助教儲惟德校之十六年輯精誠錄
則東閣大學士吳沉十八年編省躬錄則右贊善

劉三吾等二十六年輯諸司職掌則命吏部及翰林儒臣輯稽制錄則專命翰林儒臣二十七年修寰宇通衢書則學士劉三吾等定正蔡氏書傳則前編修張美和前國子博士錢宰前助教蘄觀等而三吾總其事二十八年修禮制集要二十九年修稽古定制皆專命翰林儒臣其他如省貪錄志戒錄姦黨錄諸書亦皆本院官輯焉建文二年命本院官集經史事蹟編爲類書以修撰胡靖編修楊溥等提調而徵文學之士修之命文學博士方孝孺總其事洪武三十五年九月命侍讀解薦等

增修韻府羣玉秀才汪胖與焉永樂元年命侍讀

學士解縉等修古今列女傳與修者凡十人皆本

院官也許見紀是年修文獻大成則學士解縉等

百十七人次年重修永樂大典則學士王景等二

千餘人而太子少師姚廣孝刑部侍郎劉季篈學

士解縉提督之故蹟所載永樂五年十一月見在

人纂修三百四十七人纂修兼催纂一人催纂兼

收放書籍一人催纂三人編寫三百三十二人看

詳五十七人騰寫一千三百八十一人辦事官吏

二十年又續到教授十人凡二千一百九十六人

五年書成廣孝等擇日以進

十一月十五日太子少師姚廣孝等奏欽

依修完書二萬二千二百一十一卷裝成一萬一

千九十五本賜名永樂大典欽准 皇上功成治

定稽古崇文大召儒臣纂修盛典義例出自聖裁
圖籍會於天府包羅天地該括古今貫通萬物之
情統會三才之理百王楷範萬世
弘規具奏進呈奉 聖旨收了 復命量留修書

人八百人同翰林春坊修書官騰寫刊板仍命廣
孝季箎及禮部尚書鄭賜提督六年廣孝患病季
箎緣事賜以提調缺人爲請乃命總裁祭酒胡儼
洗馬楊溥副總裁修撰梁潛一同提調是舉也徧
徵四方文翰之士而讀書庶吉士亦輟業從事焉
修書之典未有盛於此者也永樂三年命禮部尚
書李至剛等同翰林委官將洪武禮制禮儀定式
禮制集要稽古定制等書編類成書四年九月至

剛與編修鄭好義檢討王汝玉禮部郎中夏止善
太常博士劉履節以編纂前書增減不一俱命鐵
鐐之重行整理既而釋焉於時好義等以上
命嚴急倉卒完書仍多錯誤者六年爲編修周孟
簡查出乃復下好義等獄治之法司當罪死詔各
發北平戍邊十二年七月修四書五經性理大命
於行在翰林院命學士胡廣庶子楊榮諭德金幼
孜修撰蕭時中陳循編修周述陳全林誌李貞陳
景著典籍黃約仲庶吉士余學夔涂順劉永清黃
壽生陳璠陳用禮部郎中王羽兵部郎中童謨禮

部員外郎吳福北京刑部員外郎吳嘉靖禮部主
事黃裳刑部主事段民洪順沈升章敞楊勉周忱
吾紳御史陳道潛太理評事王選太常博士黃福
北京國子博士王復原御醫趙友同教授曾振廖
恩敬學正傅舟教諭王進杜觀顏敬守訓導彭子
裴留季安爲纂修官十六年纂修天下郡縣志至
正統中始成事在北院云

洪武初起居注稿皆送本院收貯建文中功臣事蹟

禮部悉開送本院史官藏之

建文元年五月禮部儀制司以魏國公開

到中山王所授券諾墓誌文冊及駙馬都尉謝達父謝彥從征事蹟牒送本院吏目廳案呈送典籍

收領給付史官考究編修皆為修史地也

考究禮制

國初徵召儒臣講究大禮儀制吳元年五月耆儒朱升應召而至尋拜侍講學士其後凡禮樂制度皆命本院官與所司議而行之洪武元年二月壬寅朔中書省臣及學士陶安等進園丘社稷之議壬子安及侍講學士朱升待制詹同等定祖廟時享之禮戊辰安等奏天子祭天地宗廟社稷五冕之制八月翰林院太常司定孔顏孟三氏廟戶賦後之典十月禮部翰林諸臣定三師朝賀東宮之儀十一月禮部翰林諸臣議乘輿以下冠服之制三

年六月省部官與弘文館學士劉基等定文武官朝服之制十一月學士宋濂定五等封爵之制四四正月禮部太常司翰林院議郊社宗廟及日月山川等祀天子羣臣祭服之制五年五月禮官儒臣定親王儀仗車輅之制六年九月侍講學士宋濂同禮部尚書牛諒定文武官封贈誥命制度七年八月禮部太常司翰林院議禘祭之禮九月孫貴妃薨命翰林院稽考服制定爲孝慈錄八年九月學士樂韶鳳考定陵寢朔望節序祭祀之禮十一月韶鳳考定大祀登壇脫舄之禮九年五月

將有事於方丘適有晉王妃之喪學士宋濂考古制以聞十六年三月中書省翰林院定嫡妾封贈及文官封贈蔭敘之例七月禮部翰林院更定冕服之制十七年七月高皇后崩專命翰林院定喪禮二十年十月六部都察院通政司大理寺及翰林院春坊官著禮儀定式一十四款二十三年三月掌院事修撰黃子澄與禮部國子監官申定官民服飾二十四年六月命六部都察院同翰林院官參考歷代禮制更定衣冠宮室器用之制十二月學士劉三五與祭酒劉季安議定科舉歲貢

程式二十五年正月翰林院國子監官考定六藝以聞六月懿文太子喪時享在邇命翰林院禮部議之二十九年學士劉三五等議定官民房屋墳塋等第名曰稽古定制其諸叅定禮儀不可悉述釋奠先師及太歲風雲雷雨岳鎮山川城隍諸神祭禮天子及皇太子冠禮皇太子親王及士庶婚禮親征遣將諸軍禮俱本院偕中書省臣上其議王國禮樂及合祀山川之儀則本院與王府官議上者也建文中制度紛紜皆本院侍講方孝孺之議靖難後率由舊章討論蓋寡矣

汪克寬曰洪武元年命中書省

翰林太常寺率諸儒定擬三禮明年再命集議禮樂又明年徧徵在野道德文章之士分局相與訂正之

吳元年命侍講學士朱升試雅樂升不能審以宮音爲徵音 上怒之洪武六年五月命太常司翰林院官及通曉音律儒士一同校正音樂審聲造詞於是學士詹同待制王僕偕太常少卿陳昧協律郎冷謙儒士熊太古同撰樂章以進俱詳見紀事中永樂元年九月命學士王景等擬撰樂章未施行而止洪武中凡朝廷大政大議必命翰林院考究典故以聞本院官各以所主經史考据條奏或考易或考書或考詩禮

春秋或考史 各有分主 然後 上酌而行焉永樂初亦如之

是時院官給由事蹟皆有檢閱經史之條蓋以此

也

參理刑政

吳元年命中書省定律令以學士陶安爲議律官

洪武十四年十月命法司論囚擬律奏聞從翰林院
給事中及春坊正字司直郎會議平允然後覆奏
論決後廢

洪武十四年十二月命本院編修檢討典籍左春坊
司直郎正字贊善考駁諸司奏啓如平允則署其
銜曰翰林院平駁諸司文章事某官某列名書之
後廢

洪武中以本院修撰等官註銷各衙門前件永樂元

年司禮監請如舊制鑄出入精微印從之仍以侍

讀等官註銷精微凡五府六部都察院等衙門關

務註銷前件按月奏送本院稽考年終類送司禮監交收遷都後事歸北院

洪武中以本院修撰等官往兵部清理軍職貼黃永

樂初如舊嘗命侍讀曾日章往代刑部侍郎劉季

箎云十九年五月命清黃編修苗衷將原清貼黃

赴京整理此後歸之北院

洪武中命修撰許觀撰寫三法榜文

校選人才

吳元年起取故元閑良官吏數百人至中書省劄付
本院考驗定爲上中下三等上等於大理司太常
司等衙門試用中等於祿職內用下等罷歸

洪武四年廷試讀卷六人一修撰王僕一祭酒一博
士一給事中二御史二十一年以後始用學士及
尚書等官永樂時九卿及學士皆與侍讀及庶子
等官亦間與焉甲申之歲 成祖思求博聞多識
之士命學士解縉採天文律曆禮樂制度擬撰爲
題以試士子及得曾棨卷記誦詳盡遂擢第一是

時吉安之士盡占高第縉竟以讀卷不公出參外

藩云

李賢古懷襍錄云劉子欽由省元至會元及將廷試解縉謂之曰狀元屬子矣子欽畧不

遜讓縉少之密示曾榮題意入對榮策獨詳遂為狀元十人後友及子欽厭其自負也按是科會元乃楊相非

劉子欽

洪武中會試主考以本院官及他儒臣兼充之而朱

善以待詔蘇伯衡聶鉉以致仕編修典籍皆特簡

也永樂二年以後專用本院及左右春坊司經局

官本院自學士至修撰春坊自大學士至司直郎

皆得充之其分考亦多用院官者

二年徐旭蘇伯厚皆分考

洪武三年應天鄉試以御史中丞劉基治書侍御史

秦裕伯爲主考而侍讀學士詹同弘文館學士睢
稼編修宋濂皆同考其後二十三年前編修蘇伯
衡爲主考建文二年以侍講方孝孺及太常少卿
高巽志爲主考永樂元年以後皆用本院坊局官
本院自學士至檢討皆得充之其在順天者以行
在翰林坊局充之二十一年以後應天主考亦用
北京翰林坊局惟正統六年本院侍講陳用爲應
天主考

試畢仍赴
京復命

其後不復見云

洪武永樂中凡各處訓導九年考滿吏部出題考試
考功司以所作文字用印封記送本院掌印官批

定通經不通經送部通經者陞用不通經者仍爲
訓導

洪武永樂中凡天下歲貢生員至京禮部送本院考
試委官批定通經不通經送部通經者入監肄業
不通經者發回本學

洪武永樂中凡各處保舉秀才儒士至京吏部送本
院引赴內府考試委官批定中式不中式送部中
者選用不中者發原籍爲民

永樂時凡監生生員儒士人等或進獻詩頌或敷陳
政事或陳情乞恩奉特旨命翰林院考試者本院

官引赴內府試畢分別優劣奏聞

洪武永樂中凡國子監生課業每季送翰林院考校
本院分委侍讀等官閱之收貯內府洪熙以後南
京國子監仍送本院校視轉繳南京內府萬曆六
年以後始廢

洪武十六年正月命韓國公李善長禮部尚書任昂
及翰林院諫院等官往國子監考定教官生員高
下分別班次二十九年四月復命魏國公徐輝祖
及禮部翰林院官考校國子監師生甄別高下以
次錄用宣德二年八月命南京六部尚書都御史

通政使大理卿及翰林院堂上官六科給事中揀選南京國子監生去其年老殘疾不堪教養者時檢討陳用以署院事與焉七年八月復行揀選陳用以修撰署院事復與後不行

永樂元年二月以天下訓導員缺詔取通經監生三百名送翰林院考試選用十一年十月復詔擇監生之有學術者六十人俾翰林院嚴試之拔其尤者二十人試六科給事中

進獻詩頌

國初學士宋濂進平江漢頌待制王禕進平江西頌
上謂禕曰吾固知浙東有二儒卿與宋濂耳學
問之博卿不如濂才思之雄濂不如卿洪武二年
十月膏露降于乾清宮後苑松樹宋濂獻膏露頌
三年四月陝西寶雞縣進瑞麥弘文館學士劉基
進瑞麥頌五月祀地祇于方丘基復進方丘頌四
年八月明昇平基又進平西蜀頌 上爲文荅焉
五年六月句容縣民張觀園生嘉瓜雙實同蒂圓
如合璧禮部尚書陶凱奉之以獻宋濂進嘉瓜頌

二十九年天下多嘉禾之瑞學士劉三吾進嘉禾賦建文元年正月郊祀禮成侍講方孝孺進郊祀頌永樂二年八月周王暉于鈞州獲騶虞九月丁未王獻于闕下修撰梁潛進騶虞詩侍講楊榮進頌已而奏甘露屢降嘉禾呈瑞外國獻麒麟白雉玄兔白鹿白象靈犀白兔之屬榮與學士胡廣金幼孜梁潛等咸爲詩歌以進三年九月朔頌太祖御書嘉禾詩于諸王及近臣先是洪武二十八年九月北平永清衛之龍門有禾異莖同穗上在潛邸遣使馳獻太祖親御宸翰賦長詩一

章以賜。上念手澤之存，募勒于石，裝治成軸，分賜諸王及學士解縉等。又適有嘉禾之瑞，縉獻嘉禾頌。四年二月視學。上服皮弁，行四拜禮，御彞倫堂，賜祭酒胡儼司業張智坐講，文武三品以上及翰林儒臣皆坐以聽。講畢，賜茶。明日儼等率師生上表謝賜賚，有差大燕羣臣于奉天門。學士胡廣進視學詩，一時詞林諸臣咸和之。是年征安南，侍講楊士奇進出師頌。次年安南平，士奇及侍讀胡廣修撰梁潛各進平安南頌。八年五月己卯，上北征本雅失里于玄溟河。七月壬午，駕還。士奇

廣潛各獻平胡頌士奇復獻饒歌鼓吹詞十年十月甘露降于方山侍講鄒緝獻甘露頌十一年騶虞見於曹縣士奇獻騶虞頌十二年六月親征瓦刺于撒里怯又北之于土刺河八月駕還庶子鄒緝獻清邊頌十七年十一月甘露降于孝陵松栢侍講王直獻瑞應甘露詩十八年正月禮部郎中周訥請封禪大臣有陰主之者於是學士胡廣獻却封禪頌上遂止十一月龍馬產于諸城修撰羅汝敬獻龍馬賦定鼎北京汝敬復獻皇都大一統賦焉其他不可勝紀

侍直

國初入直之制未詳洪武二年正月命翰林官常居禁中至晚方退其後有輪直之制二十三年編修齊麟馬京所書閱狀皆有侍立檢閱經史之條此其畧也故老言當時蓋有分番夜宿之制然無可考云若夫進呈文字題奏章疏隨上所在皆得從之如乾清宮門坤寧宮門舊大本堂和春門王宮門西苑齋宮尚麩局大庖西並得進入不爲禁洪武二十九年五月命詹事府翰林院等官於午門出入者各給牌爲驗已而罷之使近侍官得日

至便殿奏事永樂初開內閣於東角門內以處解
縉等七人其餘學士等官則入直於內府直房云

扈從

洪武初 太祖之汴梁之鳳陽本院官未有扈行者
六年幸滁州學士宋濂從焉永樂八年 成祖巡
狩北京內閣胡廣楊榮金幼孜皆從惟黃淮楊士
竒留輔東宮監國其侍講等官從者凡六人典籍
二人書制勅秀才譯字監生各數人十一年再巡
狩亦如之十五年復巡狩內閣仍三人學士而下
稍增其數詳見紀事中時淮繫獄翰林中獨士竒留輔
監國 上以爲少命再留一人戶部尚書夏原吉
兵部尚書方賓以爲梁潛可遂留之是時車駕屢

征北虜廣等三人皆在行最後師出廣已卒故獨不與

洪武八年十月 皇太子秦王晉王楚王靖江王出遊中都以講武事詔侍講學士宋濂及長史趙勳等侍行復令濂詢訪濠梁古跡隨處為東宮言之洪武二十七年韓濬二王奉命游歷秦晉諸府各令翰林編修一人王府紀善一人侍行講說經史撰

述文字

外禮部郎中一員序班典膳良醫百戶各二員凡十一人

永樂八年巡狩待詔魯瑄鄭禮侍 皇長孫以行十一年宮官學錄王讓等侍 皇太孫以行

餘未詳侍

詔李遜鄭禮侍漢世子郡王以行十五年贊善陳仲完洗馬姚友直司直郎王淪詹事府錄事張凱侍二皇孫四皇孫以行待詔李遜仍侍漢世子郡王以行皆以授經故也

永樂十八年十月 皇太子朝見於北京學士楊士奇侍行

洪熙元年五月 皇太子赴南京左春坊大學士兼侍讀學士曾棨侍讀兼諭德周述侍行東駕至南京棨等先返

Blank text columns, likely containing a list or entries, but the characters are extremely faint and illegible.

奉使

國初將命外國多翰林克之洪武二年命侍讀學士張以寧典簿牛諒冊封陳日燿爲安南王未至而日燿死嗣君日燧遣其臣阮亮來求詔印以寧不許乃留次于洱江先俾諒往其國諭以朝廷威福且教其世子服三年喪并令其國人行中國頓首稽首禮上聞而嘉之賜以寧勅書比之陸賈馬援御製詩八章以寵之日燧復遣其臣杜舜卿來告哀上素服御西苑之幄殿親製祭文命編修王廉克祭吊使又命考功主事林唐臣克冊封

使二人偕往既至境日燧出迎於郊議授受禮往返數四不能決廉厲聲訶之乃奉御製于綵輿迎入壽光殿別設日燧靈位於殿前使者南面宣之日燧率羣臣再拜俛伏以聽成禮而還是時安南占城交侵亦遣編修羅復仁偕兵部主事張復往諭之二國聽命以寧等之使也安南皆餽以黃金吉貝以寧等一無所受安南敬重之五年遣待制王禕招吐蕃行至蘭州召還改使雲南詔諭梁王把都梁王意未決會殘元亦遣使至梁徵餉饋知中國使在索之梁王乃出禕元使欲屈以威禕罵

曰天訖汝元命我明代之汝如燭火未盡敢與日月爭光乎顧謂梁王曰汝朝殺我天兵夕至矣遂遇害時六年十二月二十四日也其後王佐李原名皆以訓導遣使安南占城公幹還皆授待詔永樂二年嘗遣待詔王延齡使朝鮮云他若受命有事於內地者洪武中則有直學士詹同之訪人才編修蔡玄之訪陵寢永樂初遣侍讀曾日章往浙東公幹又令齎勅諭沐晟於雲南此後不復見云

[Faint vertical text columns, likely bleed-through from the reverse side of the page]

撰述表箋

吳元年凡中書省御史臺所進慶賀登極及天壽
聖節千秋節等項表箋皆行本院撰述永樂後
本院官與國子監學官互撰之成化七年十一月
冊立東宮南京文武官員合用慶賀表箋一十
二道南京禮部移文本院令照天順元年事例會
同南京國子監撰述該監以撰述文字俱係翰林
掌行荅之該部復屬之本院侍講陳全荅以自古
翰林代言唯制誥冊命詩頌樂章而已未聞羣臣
稱賀之詞亦是翰林撰述本監之言不知何據且

聞在京公侯伯襲爵謝恩表文俱係禮部自撰況
慶賀重事本部專職翰林安得干之翰林近侍之
官一應事務差遣非經奏請不敢行也正德六年
正月尊上 慈聖康壽太皇太后 慈壽皇太后
徽號南京禮部復移文本院與南京國子監共撰
慶賀表文諭德豐熙祭酒王瓚皆以非奉 旨不
得撰述荅之該部查有成化二十三年舊規該監
乃與本院同撰其後嘉靖十三年慶賀冊立 中
宮南京國子監撰 昭聖皇太后 章聖皇太后
莊肅皇后表文三通本院撰 皇上表文一通

中宮箋文一通十五年 皇第二子生十八年
冊立 皇太子冊封 裕王 景王禮部俱用慶
賀表箋四通皆本院撰述隆慶元年正月六年五
月禮部及五府慶賀登極表文各一通亦皆本院
撰述其他或與國子監分撰或本院自撰迄無定
例云五府表箋有中府經歷司躬請本院撰述者
有移文儀制司轉行本院者亦無定例